



N°734
Entrée le 15.05.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 15.05.2024
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 15/05/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Aussenugeleeënheeten weiderzeleeden.

An Georgien ass de 14te Mee ee Gesetz gestëmmt ginn, dat ONGen, déi méi wéi 20% vun hiren Donen aus dem Ausland kréien, dës müsse registréiere loossen. Een änlecht "foreign agents"-Gesetz ass och a Russland a Kraaft a war do een Outil vum Kreml, fir ONGen, déi sech getraut hu géint de Regimm ze schwätzen, ze verbidden.

D'EU-Kommissiouns Presidentin Ursula von der Leyen huet an engem Statement gesot, datt si ganz besuert géif op dëst Gesetz kucken: "Georgia is at a crossroads. It should stay the course on the road to Europe". Wéi Politico mellt hunn sech d'Bausseministeren aus 10 Memberstaaten un den Här Borrell geriicht, wou si ënner ë.a. froen, ob d'EU wéilt Mesurë géint de georgesche Premier huelen. (<https://www.politico.eu/article/georgia-parliament-pass-foreign-agent-russian-law-amid-pro-eu-protest-crackdown-tbilisi/>). Lëtzebuerg huet dëse Bréif net mat ënnerschriwwen.

An deem Zesammenhang wéilt ech dem Minister dës Froe stellen:

1. Firwat huet de lëtzebuergeschen Ausseminister dëse Bréif net mat ënnerschriwwen?
2. Wéi steet d'Lëtzebuenger Regierung zum "foreign agents bill"? Wat fir Konsequenzen zitt si aus dësem Gesetz?

Mat déiwem Respekt,

CLEMENT Sven
Deputéierten



www.piraten.lu



Äntwert vum Minister fir auswäerteg Ugeleeënheeten an Aussenhandel Xavier BETTEL op d'parlamentaresch Fro n° 734 vum 15. Mee 2024 vum honorabelen Deputéierten Sven CLEMENT.

Ad 1)

Lëtzebuerg gouf net agelueden sech un dësem Bréif ze associéieren.

Ad 2)

Esou wéi d'Signatairë vun dësem Bréif an der Europäescher Unioun (EU), ass Lëtzebuerg extrem besuergt iwwert d'Verschlechterung vun der Situatioun a Georgien. D'Aschüchterungsversich, Drohungen a Gewalt géint Demonstranten, Journalisten a Verrieder vun der Zivilgesellschaft sinn an enger demokratescher Gesellschaft inakzeptabel. Lëtzebuerg ass der Opfaassung, dass d'Akraaftriede vum Gesetz iwwert "Transparenz vun auslännesche Aflossnamen" d'Onofhängekeet vu fräie Medien an d'Aarbecht vun der Zivilgesellschaft a Gefor kéint bréngen. Lëtzebuerg bereit dass d'georgesche Autoritéiten den Avis vun der Kommissioun vu Venedeg vum 21. Mee 2024 net berécksichtigt hunn, dee kloer ervirgestrach huet dass dëst Gesetz net den internationale Mënscherechtsstandarden entsprécht, an deemno net kompatibel mat EU Normen a Wäerter ass.

Lëtzebuerg huet Georgien dobäi ënnerstëtzt den EU-Kandidatstatus ze kréien a bedauert dofir zudéifst dass d'georgescht Parlament an d'Regierung op e Wee schéngen ze goen, deen d'Beméiunge vum Land a vu ville Georgier fir hier europäesch an euro-atlantësch Integratioun a Gefor bréngen. De Minister fir auswäerteg Ugeleeënheeten an Aussenhandel Xavier Bettel hat schonn d'Geleeënheet d'Lëtzebuenger Bedenke mëndlech mat sengem georgeschen Homolog ze deelen.

Lëtzebuerg ënnerstëtzt weiderhin déi europäesch Zukunft vun de Georgier a rífft déi georgesche Autoritéiten dozou op hiert Bekenntnis a konstitutionell Obligatioun fir d'EU-Integratioun ze erneieren, d'Opportunitéit vum uewen ernimmte Gesetz ze reconsideréieren an déi néideg Reformen op hirem Wee an d'EU virunzedreiwien.

Lëtzebuerg, den 30. Mee 2024

De Minister fir auswäerteg Ugeleeënheeten
an Aussenhandel

(s.) Xavier Bettel